



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :

Tir Yimyim

tiryimyim@aolima

tir yimyim

TAPAK 3

Sudan PM puogo, mitkari state of emergency sangdong

Assam Education Minister Ranoj Pegu-i Online Portal lapoktsüogo

VOL. XIX NO. 18 (ADOK 18) DIMAPUR SANGTENNÜ (TUESDAY) MONGPUTENI (OCTOBER) 26, 2021 ₹ 5.00

Chief Secretary-i sorkar kiojen merüka ayutsü tuyur

Dimapur, October 25, 2021 (TYO): Kohima capital complex area nung Directorate aser ki kar jungjunga anepalu mesüi ayur, ta Nagaland Chief Secretary, J Alam-i metetdaksüogo.

Sorkar office aser kiojentem mapang shia merüktetsüla kechiyong iba ajanga tangar nem merükmejuba yimya tajung sayur, ta pai ashi.

Head of Department (HOD) ajaki pei pei office, common area, stairs, parking lots,

pathways, metsümeshidak aser temeket merüka ayutsü mepishir, ta Chief Secretary-isa ashi.

Action taken may kindly be furnished by 31.10.2021 to the Chief Secretary's office.

Taruba anogo 10 tsüingda HOD ajaki directorate aser office tem nung merükmejuba mapa inyaksü aser October 31, 2021 tashi nung Chief Secretary indang office nem osang agütsütsü metetdaksüogo.

Chiecha Kuda Union (CKU)-i aitsür

Dimapur, October 25, 2021 (TYO): October 13, 2021 aonung Khopanalä tesem nung ozü züngsem Keneiletuo Zumvü-i Aremchang Imchen dak teka sangshiba aser kanga mejungi yirutsüba khukhua aitsür ta Chiecha Kuda Union (CKU)-i metetdaksüogo.

"Keneiletuo Zumvü aser pa den yariteper Kevechülo Koza nati iba mapa inyakba ya lokti ajungai aitsütsü dalang lir. Talisa Naga nung yimjung aser telongjem atema inyakba mapang ka nung iba ama mapa tamajung inyakba

aitsür" ta CKU President Dr. Tolta Metha aser Advisor Menguzelie Rio nati sangdong ka nung ashi.

Tenati mapa tamajung inyakba atema onoki tatok magütsür aser temeten angutsü atema akokba tashi ozüing amertem nem teyari agütsütsü. Külem Naga kintem den yimjung nung aser putepa alitsü atema onoki meranga inyaksü, ta CKU-isa metetdaksü.

CKU-isa adianu Aremchang Imchen tekaraba nung taneptsü angutsü sarasademar ta mendenpurtemisa ashi.

COVID-19 Nagaland: 14 dak putet, 8 taneptsü angu & 2 asü

Kohima, October 25, 2021 (TYO): Hombarnü Nagaland nung nisung 14 dak COVID-19 putet aser parnok züngsema nisung ajak agi 31,726 kümogo.

"Tanü putetertemji Dimapur nung 6, Kohima, Mokochung o Wokha nung anana (2) aser Mon o Tuensang nung kaka (1) lir" ta Integrated Disease Surveillance Project atema State Nodal Officer, Dr Nyanthung Kikon-isa ashi.

"Tesüiba ghonda 24 tsüingda nisung 8 taneptsü angu. Parnokji Dimapur nung 4, Mokochung nung 2 aser Kiphire o Kohima nung kaka (1) lir" ta paisa ashi.

Nisung 31,726 rongnungi 29,768 taneptsü nguogo aser ibaji 93.82% taneptsü anguba lir, ta Dr Kikon-isa ashi.

Tang nisung 247 anepaludar saka parnok 194 dakbo shirangba yimya kecha mali, ta paisa shisem. Hombarnü Dimapur aser

Tuensang nung COVID-19 puteta alir nisung kaka asü aser tena züngsema tasür ajak agi 681 kümogo, ta Dr Kikon-isa metetdaksü.

"Deobar tashi nung nisung 706,260 nem COVID-19 vaccine indang dose 11,74,152 agütsüogo" ta State Immunization Officer, Dr Ritu Thurr-ia ashi.

"Vaccine agirtemji frontline workers 60,957, healthcare workers 15,998, arishi küm 45 ser tempur 201,515 aser arishi küm 18 nungi 44 tsüingda alir 427,790 lir" ta paisa ashi.

"Vaccine agirtem rongnungi nisung 467,892-i dose anaprong agiogo. Parnokji frontline workers 47,815, healthcare workers 13,360, arishi küm 45 ser tempur 156,629 aser arishi küm 18 nungi 44 tsüingda alir 250,088 lir" ta Dr Thurr-isa metetdaksü.

Assam nung lockdown malitsü: CM Sarma

Guwahati, October 25, 2021 (Agencies): Assam nung lockdown malitsü ta Assam chief minister Himanta Biswa Sarma-i metetdaksüogo.

Assam nung lockdown alitsü akok ta social media nung olulutem prokshiba atema chief minister Sarma-i iba ya metetdaksü.

"Nisung kari lockdown alitsü ta olulutem prokshiba ni angashio. Item olulu asoshi kuli kecha mali" ta pai ashi.

"Nübertemi tiyazü osang nung mamangtsü ayongzüker. Sorkari nisung ajak nem vaccine agütsüba mapa 100% atongtsü asenoki yaritepedi" ta Sarma-isa metetdaksü.

COVID-19 tensa dak

rangloker Assam nung lockdown alitsü akok ta anogo ishika tejakdang state Minister Pijush Hazarika-isa ashi.

"COVID tensa tajungba mekümra state sorkari lockdown benoktsü akok. Public-i mekümdangra lockdown alitsü akümtsü" ta pai ashi.

Durga Puja amongba sülen Assam nung nisung aika dak COVID-19 putetba atema state sorkari tenokdangbatem agütsütsü bilemer ta taoba mapang Assam health minister Keshab Mahanta-ia shiogo.

Anogo 3/4 tsüingda Assam nung nisung aika dak COVID-19 putetra sorkar tenokdangba takang kar agütsütsü ta Mahanta-isa metetdaksü.

Dimapur nung gari lenmangtem anepalutsü akhanger



Hombarnü Dimapur District Congress Committee aser NPCC Minority Department den parnok kübok aliba telok balala nungi züngsemtemi Dimapur nung gari lenmang tia mejungi aliba anepaluang ta takhangba agüja lungkak aйдang agiba noksa angur. (Dimapur, October 25)

Dimapur, October 25, 2021 (TYO): Dimapur nung gari lenmang majungba atema Dimapur District Congress Committee aser NPCC Minority Department den parnok kübok teloktemi tesem aika nung lungkak aitogo.

Tesüiba küm 10 tashi Dillai Gate nungi National Highway, PWD Road, Midland-Dhobinala, G.S. Road-Station Road aser Tragopan Junction nung gari lenmang meyanglui dang arur.

"Lenmang majungba ajanga auyi adoker aser iba ya air pollution lir. Ano, tzüingluruwa

mapang gari lenmang nung tzi atüingdener aser kilentzü ayimdak tangbanger. Item ajak ya meimchir libaliro asoshi lendong lir" ta NPCC minority cell chairman, Rajesh Kr. Sethi-isa ashi.

"Dimapur ya Nagaland nung shishilembabaren inyakkak tesem lir aser idak nungi Nagaland atema dang masü saka kidanger state dangia wholesale yoker. Saka sorkari küm aika Dimapur senzuka yutsür aser gari lenmang nung ongken ka danga metangbanger" ta NPCC president, K Therie-ia ashi.

"Dimapur nung alirtem

longjemer gari lenmang yanglutsü atema ola adoktsüla. December 31, 2021 tashi nung gari lenmangtem meyanglura shishilembartemia tax magütsütsüla" ta Therie-isa ayongzüker.

"Gari lenmangtem meyanglura onoki PWD office tem mokdangtsü aser sorkar mapa meinyakkdaksütsü nangzüker. Gari lenmangtem meyanglu tashi onoki noktaksü" ta paisa ashi.

Congress züngsemtemi lungkak aitba sülen Deputy Commissioner, Dimapur nem memorandum ka agütsü.

Nagaland nung Jal Shakti Abhiyan (JSA) meyipa repringshi

Dimapur, October 25, 2021 (TYO): October 25, 2021 nü Nagaland nung Jal Shakti Abhiyan (JSA) meyipa repringshiba senden ka menogo.

Iba senden nung mendenji Nagaland Chief Secretary, J Alam, IAS liasü aser Additional Secretary & Mission Director National Water Mission, G Ashok Kumar, IAS aden.

"Prime Minister-i March 22, 2021 (World Water Day) nü Catch the Rain campaign kübok JSA tenzüksü. Iba ya tsüingsang-mopung aser ali den putepa nübertemi tzüinglu tzi bendena ayutsüba ayongzüksü tenzüker" ta Ashok Kumar-isa ashi.

Jal Shakti Abhiyan: Catch the Rain campaign ajanga linük nung district ajak kübok rural blocks aser urban areas dena lir. Iba ya tzüinglu

tzi akokba tashi bendena ayutsüba, geo tagging asütsü, tzi wazuka ayutsü atema Scientific plan renemtsü, district ajak nung Jal Shakti Kendra lapoktsü aser Jal Andolan nung nisung ajaki shilem agidaksütsü atema lir, ta paisa ashi.

"Bangdak department tem aser local administration-i sorkar kiojen ajak nung Rain Water Harvesting Structures yanglutsüla, water harvesting structures yanglutsüla, ayongtem merüktsütsüla, tzi atüingdenba alitem anepalutsüla aser tzi agi mobangba tesemtem atsünga agiba noktangtsüla" ta Mission Director-isa metetdaksü.

Department of Water Resources, Nagaland-ia senden nung osang agütsüdag "NABARD, kübok Department-i water conservation projects

inyaker" ta ashi.

Department-i Nagaland ajungalen water bodies 1368 jangaogo. Wokha District nung virtual Jal Shakti Kendra ka lapokogo aser tanga District tem nunga virtual Jal Shakti Kendra lapoktsü, ta parnokisa ashi.

"Mission Director National Water Mission-i Nagaland nung Jal Shakti Abhiyan mapa küma inyakba nung temolung agütsüba atema pelar" ta Chief Secretary, J Alam-isa ashi.

National Water Mission ajanga Nagaland ama tenem agi sünga aliba tesemtem den apet schemes aser programmes renemtsü imlar, ta paisa ashi.

State Department temi tekaratiba nung alizüing tonga inyaka aotsü merangtsü, ta Chief Secretary-isa nangzüker.

Abhijit Sinha-i photography exhibition lapoktsü

Dimapur, October 25, 2021 (TYO): Principal Home, Abhijit Sinha-i Hombarnü State Museum, Directorate of Art & Culture, Kohima nung photography exhibition ka tenzüksüogo.

Iba sentong ya Department of Information & Public Relations (DIPR) ajanga ayongzüka agir.

"October 31, 2021 nü National Unity Day amongtsü atema iba exhibition ayongzüker. Iba ya India nüjiso ngur küm 75 ajungba Azadi Ka Amrit Mahotsav den külemi amonger" ta Additional Secretary, IPR, Asangla Imti-isa ashi.

"October 31 nü National Unity

Day amonger aser iba ya linük meimba aser India sensotem tsüingda telongjem adokdaksütsü nükjidong nung amonger" ta Abhijit Sinha-isa ashi.

Iba anogo ya mezüing 2014 küm among. October 31, 1875 nung Sardar Vallabhbhai Patel asoba nungtem nung iba anogo amonger, ta paisa ashi.

"Vallabhbhai Patel ya nüjiso atema rarar ka liasü aser India nung mezüingbuba Deputy Prime Minister aser Home Minister inyak. Indian Union nung state 565 dendaksüba nung pai tongti shilem agia liasü. Patel dang 'the iron man of India' ajar" ta Abhijit Sinha-isa metetdaksü.

National Unity Day ya linük ajungalen amonger aser iba anogo nung nisungtemi Patel bilemteter, ta paisa ashi.

"Azadi Ka Amrit Mahotsav ya India nüjiso ngur küm 75 tejakleni aruba atema amonger. Azadi Ka Amrit Mahotsav ya March 12, 2021 nungi tenzüker aser hopta 75 sülen August 15, 2023 nung tembangtsü" ta Abhijit Sinha-isa metetdaksü.

Iba sentong nung Department of Information & Public Relations aser Art & Culture ketdangsurtem aden.

Iba photo exhibition ya October 24 nungi 31, 2021 tashi alitsü.

Nagaland nungi teshimtet nisungtemi Mizoram semdang



Nagaland nungi teshimtet nisungtemi Mizoram semdangba mapang Mizoram Chief Minister Zoramthanga den külemi tangokba noksa nung angur

Dimapur, Mongputeni/Oct. 25 (TYO): Mizoram sorkar indang Mizoram Youth Commission (MYC) ajanga jaokba ama Advisor to Chief Minister, Nagaland aser Vice President of the Athletics Federation of India, Abu Metha-i anir Advisor, Task Force for Music & Arts (TaFMA), Government of Nagaland, Theja Meru; Rattle & Hum Foundation (RHF) tir, Neingulie Nakhro aser kentener aser Creative Producer, TaFMA, Imcha Imchen nungertemi Mizoram semdanga liasü.

Parnok ya October 23, 2021 nü Mizoram tonga ao aser October 25, 2021 nü meyipa shilanga liasü.

Parnoki mezüngbuba nung Laldenga Memorial semdanga yangji Mizoram indang Chief Minister mezüngbuba aser Mizo movement nung lenir nem akum agüja naro inokja liasü.

Iba sülen parnoki Mizoram Chief Minister Zoramthanga den par kidang ajurutepa liasü. Iba mapang Nagaland sorkari sentong aser mera balala agiba, talisa lanurtem atema inyakba indang Metha-i lemsatepa liasü. Pai Nagaland nung Asia Music Summit, the South Asian Cross Country Championships aser the Grand Finale of the Indian National Rally Championships amala international sentong tem nung Mizoram nungia shilem agitsü jaoka liasü.

Naga Peace Process nung Zoramthanga-i shilem tajung agiba atema pai pelaba lemsatep aser iba yimjung ken o jembiba takok angutsü asoshi ajaklen nungi imla atar, ta Mizoram Chief Minister-i ashi.

North eastern state tem, talisa Mizoram aser Nagaland lungjemer Agriculture & allied

employment adokdaksütsü asoshi mera agiba indang lemsatepa liasü.

RHF tir, Neingulie Nakhro-i Nagaland indang temeja sentong, Handshake Concert rateta shia liasü, koba International, National aser Raj Bhavan editions lir.

Iba sentong ya ajanga kentener aser artist noklang aika international sapang aser linük balala nung shilem agitsü maongka bena arutsü, ta pai ashi.

Aruya aliba RHF indang sentong nung Mizoram nungi kentener aser artist nem shilem agitsü maongka agütsütsü, koba linük balala nung Indian Embassies tem den lungjemer ayongzüker, ta pai ashi.

Metha, shiba Athletics Federation of India (AFI) nung Associate Vice President lir, pai Mizoram Athletic Association aser Mizoram Olympic Association nungi teshimtet nübutem den senden mena liasü.

Pai Mizoram nung saisapong balala indang osang agi aser AFI nungi nungita yaritsü, ta shia liasü.

North East nung athletics temaba jenjangi ajungkettsü AFI nükla lir aser iba yongji South Asia Athletics Federation kübok Nagaland nung South Asian Cross Country Championships alitsü renemshiba mapang lir, ta Metha-i ashi.

Mizoram aser danga Northeastern state tem nungi Technical Officials aser Coaches tem atema AFI ajanga training agütsütsü.

Federation of Adventure & Motor Sports Associations of North East mendenpuba, Abu Metha-i Mizoram Motorsports Association (MIMSA) den senden mena Northeast nung motor aser adventure sports den külemi tourism aser service industry temaba jenjangi ajungkettsü atema sentongtem jembia liasü.

Nagaland nung 2022 nung agitsü aliba Indian National Rally Championships Grand Finale nung MIMSA nungia arua adentsü pai jaoka liasü.

Parnoki mainland nungi kentener, event manager, music industry nungi teshimtet nisungtem, Indian Centre for Cultural Relations (ICCR) nungi lenirtem aser Mizoram nungi entrepreneurs lanurtem den sensaksemba mapang ka agia liasü.

Piles Anepaluba - H. Umar Chesam dang alakteta pelaba metetdaksür. Piles, Fistullah, Gastric, Sinus aser Tonsil-Athjma agi ni kangshia liasü aser Rectum nungi azü alu dang mapang talangka item limtem nungi junga taneptsü mangu. Ajiuaka, tang **H. Umar Chesam contact no. 9863758600 / 8416087414 National awardee H. Umar Chesam**
Address: Burma Camp 2nd Police point opp. tetuyuba nung anidaka surgery kecha magii (non-surgical) anepalur anogo ishika tsungda ni taneptsü ngua liasü aser iba sülen tanü tashi kü temang nung limtem kecha mali. **Time: 9 AM - 5 PM**
Yours sincerely - Limatoshi Add: Purana Bazar



Mangkolemba nung plastic amshiba mita ao



Dimapur, Mongputeni/Oct. 25 (TYO): Mangkolemba Town Council aser Mangkolemba nung aliba Dobashi temi Mangkolemba nung khen atema amshiba plastic ajunga nokdanga alibatem October 25, 2021 nü ajungben mita oa liasü. Iba mapang parnoki 300 ml water bottle cartoon 13, polythene bags seret pungo pua aibelener dang senchi sen 10,000 chia liasü.

Mangkolemba Town Council

ajanga ano maneni dokan kibur aser nübutem dang Mangkolemba Town nung mürekmejua alitsü aser libajen wazüka ayutsü mechi khen atema amshiba plastic bags, plates, plastic cups, straws, stirrers aser danga osettem Styrofoam (thermocool) agi yangluba, 1 Litre dang tajemba mineral water bottle, polythene, nylon, polyvinyl-chloride (PVC), polypropylene aser poly styrene tem mamshitsü ayongzüka liasü.

Govt. School tesayurtem Essay zülutepba nung takok angur tushio



Dimapur, Mongputeni/Oct. 25 (TYO): Department of School Education (DSE) ajanga ayongzüka Government school nung tesayurtem Essay zülutepba tetoktepba nung takok angur nem sempet agütsüba sentong ka Project Management Office, Directorate of School Education, Kohima indang Conference Hall nung October 25, 2021 nü agia liasü.

GHS Zuheshe, Niuland nung tesayur Pangkhao Konyak-i 'Educational Vision: Best Practices in School Governance and Management' onük nung tajungtiba zülua liasü.

Nagaland nung education system melenshitsu aser shisaliok jenjang ajunga renloktsü nükjidong nung tenzüka project tema tesayurtem shilem aliba angatetdaksütsü mechi iba essay competition ya ayongzüka liasü, ta Project Director of Nagaland Education Project -

The Lighthouse (NECTAR), Shanavas C., IAS ajanga ashi.

Iba tetoktepba nung state nung aliba district 12 prong nungi Government school 83 nungi tesayur 134-i shilem agia liasü.

Iba tetoktepba nung tematiba jenjang ngutetsang tesayur nem sen 20,000 jenjang Android Tablet ka aser school atema sen 20,000 jenjang all-in-one printer ka agütsü.

District level nung takok angur nem sen 19,000 jenjang Android Tablet ka den school atema sen 8000 jenjang all-in-one printer agüja liasü.

District level category nung essay zülutepba nung takok angurtem dang item sempet ya PMU Office, top floor, Directorate of School Education, Upper Bayavü, Kohima nungi October 25 aser October 29, 2021 (anepdang 10:00 ako nungi nikongdang 4:00 ako) tsungta arua meshitsü metetdaksü.

FONSESA lokti mungdang alitsü

Kohima, Mongputeni/Oct. 25 (TYO): Federation of Nagaland State Engineering Service Association (FONSESA) pur küm ana nung khen agiba lokti mungdang Bodhbar (27.10.2021) anepdang 11:00 nungi Hotel Japfu, Kohima nung agitsü, ta

sangdong ka ajanga metetdaksü.

Iba sentong nung Chief Secretary, Government of Nagaland, J. Alam, IAS tongti o jembir ama arua adentsü. Kasa sentong nung, 'Vision Documents' sayatsü, ta sangdong ajangasa ashi.



ADC Planning Conference Hall, District Hq. Mokokchung nung Mokokchung District CHILDLINE ADVISORY BOARD (CAB) mendenpuba aser Deputy Commissioner, Limawabang Jamir lenisüba kübok Mokokchung District CHILDLINE ADVISORY BOARD senden October 25, 2021 nü mena liasü. Iba senden nung Subonenba Longkumer, Nodal Director ajanga CHILDLINE 1098 Nagaland inyakyim balala indang PowerPoint presentation agüja liasü.

Assam Education Minister Ranoj Pegu-i Online Portal lapoktsüogo

Guwahati, October 25, 2021 (Agencies): School ajanga küm tom (half yearly) aser Annual Exams ketdangsüa agiba nungi kaketshirtemi anguba marks tem record nung ayutsü atema Hombarnü Assam Education Minister, Ranoj Pegu-i online portal ka lapoktsüogo.

Pegu-i Twitter nung "School ajanga küm tom (half yearly) aser Annual Exams ketdangsüa agiba nungi kaketshirtemi an guba marks tem record nung ayutsü atema online portal ka lapoktsüogo" ta ashi.

Kasa anogo Ranagapara jila anasa Garubandha Gaon Panchayat kübok Misamari HS School campus nung Pegu-i



Ranoj Pegu (File photo)

children's park aser gymnasium ka semzükja liasü.

Iba mapatong tulu ana ya Assam Sorkar indang 14buba Finance Commission Grant kübok renem.

Minister for Irrigation and Housing and Urban

Development, Ashok Singhal matsüngdang iba project lapoktsüdang Minister Pegu-i, "terenlok tsütsü tang State nung maparen ajak takok ngua inyakdar" ta ashi.

Iba sentong nung jembiba mapang Dr. Pegu-isa terenlok aliba tesem talisa Misamari ama tanga tesem nung terenlok maparen mapa küma inyaktsü asoshi ajaki longjemer inyaktsüla ta ayongzuka liasü.

Tanga sector dak alia State Sorkari education sector nung tali temulung agüja inyakdar, ta Minister Ashok Singhal-ia ashi.

Iba sentong ya School Principal, Kanak Chandra Bardaloi tawabangba kübok agia liasü.

Cargo belenba maparen karadaktsütsü asalentong yangludar: Sonowal

Guwahati, October 25, 2021 (Agencies): Brahmaputra ayong nung cargo belenba maparen tekaraba inyaktsü atema asalentong yanglua inyakdar, ta union minister Sarbananda Sonowal-ia ashi.

"Iba connectivity inyakyim karadaktsüba ajanga Assam nung rongsenketzung tsütsü terenlok lidaktsütsü" ta Union minister of ports, shipping and waterways, Sarbananda Sonowal-ia metetdaktüsü.

Assam aser northeast connectivity hub kati melentsütsü atema Centre indang Act East Policy ya tongtibang shilem ka lir, ta Sonowal-isa ashi.

Dibrugarh district kübok

Brahmaputra ayong ajangdanga yangluba Bogibeel apu anasa cargo terminal, tourist jetty aser projects balala inyaktsü asoshi maparen renemshiba repringshimsü mechi, Sonowal-ia tesem semdanga liasü.

Assam nung Dibrugarh ya linuk indang river port city kati melentsütsü atema mera balala achaayanga inyakdar, ta Sonowal-ia ashi.

"National Waterway-2 (Brahmaputra) aser NW-16 (Barak) yangluba ajanga Bangladesh den sendakteptsü atema yaridar. Iba den külemi item maparen ajanga lima shishilembaba tesem balala den sendakteptsü asoshi lenmang yanglur" ta Sonowal-isa ashi.

Mizoram nung Myanmar nunger ka densemanisung asem apu

Aizawl, October 25, 2021 (Agencies): Mizoram nung tesem balala mita aoba mapang, sen lakh 25.20 alang heroin gram 888 shi ngutet. Iba maparen dak sendakba nung Myanmar nunger ka densemanisung asem puogo.

Hokolbarnü (22.10.2021) Kolasib District nung Mizoram excise & narcotics department indang ketdangsürtem aser Border Security Force (BSF) na longjeme r mita aoba mapang nisung ka apu aser team-i pa ket nungi heroin gram 808 dak tema ngutet, ta excise department-i ashi.

Osang tejangja ka nung ajemdaker National Highway-306 tsütsü North Chhimluang village nung excise & narcotics department indang ketdangsürtem aser Border Security Force (BSF) team kati mita ao.

Pua alisang ya Kolasib district kübok Vairengte yimtsüng nung alir arishi küm 47 tain Ramneihthanga ta jangjaogo aser pa ket nung sen lakh 22.75 alang temesepba mozü apu. Honibarnü, Mizoram excise department-isa Aizawl indang Hunthar tesem nung sen 70,000 alang heroin gram 22 shi ngutet aser iba maparen dak sendakba nung nisung ka puogo.

Temesepba mozü shibelener ya Champhai district kübok Bethel veng nungi arishi küm 28 tain Lalrindika ta jangjaogo.

Maneni, kasa sangdong ajanga angazükba agi, Deobarnü Champhai district kübok Zote yimtsüng anasa department-isa heroin gram 58.7 shi ngutetta liasü.

Iba temesepba mozü shibelener ya Myanmar nungi arishi küm 39 tain Gawihsianvungi ta jangjaogo aser la ket nungi sen lakh 1.75 alang temesepba mozü ngutetba yong la apu.

Narcotic Drugs & Psychotropic Substances Act, 1985 indang section balala nung ajemdaker pua alir asempronlga anema ken o benoka lir.

AO SENSO TELONGJEM GUWAHATI PLATINUM JUBILEE (1946 -2021)

OMEN :
Telongjem Nung Tejakleni

TONGTI TEJAOKER:
Mr. Limasünep Jamir, IPS
IGP (Range) Kohima, Nagaland

ANOGO : 4th November 2021
MAPANG : 10 am to 12 noon
TESENTEPDAK : Shilpgram, Panjabari

SENTONG

1. Menden	: Miss. Lipoksenla
2. Sarasademtsü	: Rev. Prof. Akheto Sema, General Secretary, CBCNEI, Panbazar, Guwahati
3. Telok Ken	: Kü Linük Ne Meyong
4. Asür bilemtetba	: Rev. Aowabang, Pastor ABCG
5. Tarur pela-a agizükba	: Mr. Temsüzulu, President ASTG
6. Tepela O	: Mr. Lanunochit Ningdangri (Grandson of Late Imnameren)
7. Jubilee nüngo kaketsaya	: Mr. M. Talimoa, Convenor
8. Kija-i atenba ken	: Mr. Moainba
9. Tayongzükba O	: Rev. Puna Ao
10. Temeja ken ka	: ABCG Youth Ministry
11. Onük	: "Telongjem nung Tejakleni" Tejembir, Tongti tejaoker : Mr. Limasünep Jamir, IPS IGP (Range), Kohima, Nagaland
12. Melepzüng O	: Rev. Toshirenba, Convenor Planning Committee
13. Tatem Sarasadem	: Mrs. Anungla Imchen

Jubilee Benjong Chiyongba mapang (Jubilee Feast) 12:30 pm to 1:30 pm

Iba sentong nung Guwahati nung alir Aor Kija, Kibong, Anükapang aser ano Guwahati nung lir aor ajak arua atentsü pelashishia jaoker.

AO KAKETSHIR TELONGJEM GUWAHATI PLATINUM JUBILEE (1946 -2021)

OMEN :
Linük Asoshi (For The Nation)

SENTONG MERAKETTSÜR :
Dr. Longrineken Ao
Advisor
National Highway Treasuries & Accounts Govt. of Nagaland

TONGTI O JEMHIR:
Mr. Tongpok Pongener
Advocate, Gauhati High Court, Kohima Bench, Nagaland

ANOGO : 4TH NOVEMBER 2021 **MAPANG :** 02 PM TO 04 PM
TESENTEPDAK : SHILPGRAM, PANJABARI

SENTONG
Pianist : Suneper Aier

Sentong Lapokba aser Jubilee Sangro

1) Sentong Ketdangsür (Compere) :	Mr. Sangyu & Miss Ariben
2) Telok Ken	: Tsüngrem Dang Sentsüwangshi
3) Sarasademtsü	: Mr. Lanu Wallinger
4) Asür bilemtetba	: Rev. Temjen Lkr
5) Tarur pela-a agizükba	: Mr. Temsünungsang Pongen President, AKTG
6) Sentong Meraketsür O	: Dr. Longrineken Advisor National Highway, Treasuries & Accounts Govt. of Nagaland
7) Temeja ken	: AKTG
8) Greetings	: President, NSUG
9) Jubilee nüngo kaketsaya	: Mr. M. Talimoa, Convenor
10) Tongti O Jembir	: Mr. Tongpok Pongener Advocate, Gauhati High Court (Kohima Bench) Nagaland
Onük	: "Teyakyak alizung tongtetba lanur ka".
11) Melepzüng O	: Rev. Toshirenba Convenor Planning Committee
12) Sarasademtsü	: Mr. Tiatemsü, Treasurer AKTG

Iba sentong nung Guwahati nung alir Aor Kija, Kibong, Anükapang aser Guwahati nung zünger aor ajak atentsü pelashishia jaoker.



TIR YIMYIM YIMOBILEM (EDITORIAL)

DIMAPUR SANGTENNÜ, MONGPUTENI(OCTOBER) 26, 2021

Mulung lemtetba purtem asütsüla

Alima nung nisung dak aliba tashi angudak aser agütsüdak tulutibaji kati ka dak temulung lemtetba ya asütsü südi. Aji oda, Tsüngremia asen dak temulung lemtet nung dang moatsütsü aser nisungia asen dak temulung lemtet nung dang mapaa aser teyaria agütsütsü aser asen nungdakba mapang tapua aputsütsü. Anungji, tangari temulung lemtettsüsa alir takümsa takarba aser teloksa tashi taitba asütsü. Iba amaji, yimten, arogo aser lokti lenitsüba mapa nunga teloki temulung lemtetba nisung alitsüba kanga nungdaker. Tatishitsü agi, arogo nung mesüra lokti tentet ka nung sen mapangser asütsü asoshi nisung shimtsü nungdaker, saka züngsem ka dak danga temulung alemtsüsa mali, paibo mesüra laibo lokti aser arogo meyong tesarutetba ajunga miima agiadoktsüba nisung süra, iba telok aser arogoji komaka taküm lia aotsü ? Kasaji, yimten nunga ozüng raksaba mapatem anema inyaksü asoshi tasü tait aser teindang nisung kar nungdaker saka yimten mapa nungji ochishia inyaksüla nisung kata melira, iba limaji ozüng raksaba mapa nungi koba tashika kümzüka litettsü ? Aji oda, akhidang nungi koba lima aser yimten südir süaka, tsükchirtem ket nungi pei lima aser nübortem kümzüka ayutsü asoshi mitsa nung mitkartem nem mitdaksür. Iba jagi tsükchirtemi mitsa nempoka marutet nokdangadoker. Iba kasaji tanüa alima aser yimten shia pei süngkümüji mitsa lir, anungji yangji mitkartemi amang sangwa methitemi anüker. Atangji, akhi putu tsükchir o tanü putu tsükchir na balala asütsüa akok, kechiyong akhidangbo tsükchirtemji bendanger yimmakertem dang liasü saka tanübo yimmakertemji tekolak bushir aser tangar yimli atsüngdoker yimsütsü atema yimten tashi bushirtem dang masü saka ozüngi memelaba osettsüset aser machimajemtsütem shibelenen ayokertem lir. Itemji yimten aser nübortem asoshi kanga lendong aketba tsükchirtem lir. Item jagi yimten meyong rongsenren jenjang tashi mait aludaktsütsü aser tarutsü putu nung pei lima anüker malitsüsa lanurtem taküm raksatsütsü. Iba tangatetba nung, tang aser tarutsü nung pei lima aser nübortem kümzüka ayutsü atema government-i maparen shia mitkar tapu balala shimer pei lima aser yimti süngküm nükdaksür. Item mitkartem alibaji ajanga dang ozüngi memelaba prangpong injang, hon taribi, yi aser mozümora shibelenertem nokdang aser parnok mapaji sadema meinyaktettsüsa kümmdaksür. Aji oda, tanü asüng balaka Nagaland artsü ajaklen mitkartemi anükba mitsa (check post) nung itemla ozüngi memelaba oser aser machimajemtsütem apuba osang angashir. Iba jagi asenoki memeteti kija kibong taküm aika kümzükdagi ta asenoki bilemdi. Aji oda, item mitkartem jagi mitsa nung anogo shia ozüngi memelaba yi aser mozümora apuba dang masü saka tangbo hon sen crore 22 jenjang apuba osang metetdaksüba to agi, mitkartemi asen lima aser nübortem ozüng raksartem ket nungi kümzüksü asoshi nübortem parnok dak temulung lemtettsüsa inyakba tasü tait aser teindang shisatsü tuluka sayuogo aser ano külen asen lima nunga ozüng raksartem shibelenen mapa tapu balala inyakba tensa tia indang metetogo. Ajisüaka, ano kasa tatalokba maparen nung hon apur mitkar par ter aseme hon shibelenen ket nungi apuba hon-temji shitak mayuba ajanga mapa nungi agiena atatsüsa akümba osang jagibo parnok dakji temulung melemettsüsa tezudangtsüka atalokogo. Aji oda, mitkartemi ozüng anema shibelenertem ket nungi apuba yi aser mozümora yimten ket nung ayutsü melen pei ajangzüksü asoshi miima kar agiteta yura, itemjibo ozüng anema shibelenertem dang nungi tamajungba pei lima aser nübortem ashioktsürtem asütsü. Kasaji, aiben mitkartemi ozüng alema shi belener ket nungi temulung melemettsüsa sen aika bener jajaba putettsüa akok, mesüra tang amaji hon taribi sen crore noklang jenjang aputsüa akok. Iba ama tensa mapang, ashiko, nisung asünungji pei shisatsü nung itemji aginüa bilemstüa akok. Ibaji pei lima tsükchirtem ket nungi kümzüksü asoshi yimteni temulung lemteta shimtetba mitkar ka asoshi tatidang tuluka asütsü. Yi pongdang ter metsüka agiteta yur mesüra sen tera meshia yur odang ozüng raksaba mapaji inyadoktsütsü asü ? Mozümora talep kar miima yur tezülen nungi asen atema senotsü kar ajangzüksü merangtsü asü ? Hon biscuit ka ana miima yur, iba jagi asenbo takar akümtsü saka alimabo ozüng raksaba mapatem agi süngdaksütsü ta inyaksü asü ? Alima rongsenji masü saka tanü asen lima asen chirnurtem asoshi yanglushitsütsü atema nungdak tongtibangtibaji temulunglemtetba nisung lir. Iba nisungji asenok asütsü merangdi.

OLEMSABANG

Election meruka magitet tashi asen Naga lima teraksa meyanglushitetsü

- L. Kika Pongener

Tanü asen Naga lima teraksa, meputep, tsükchitep, tarishitep, telemsa aser ochimashi agi sunga aliba ngua, ya kodaser yanglushitsü (?)...ta khuret abenba agi, olemsabang nung lenir tajung aikati pei tangatetba shisa lemsatepba ngua kanga temulung achir. Ano 'Yanglushidi Sensaksem Sabang' (YSS) nung Aotsür Aor theologian, scholar, senior citizen, osang zülur, parnoki asen lima teraksa yanglushitsü asoshi kanga suoki ia lemsatepba ngua tanübo asen lima meimer lenir tajung aika adokogo nii...ta kanga temulung chia pelaseter. Tanü Naga lima yimtsüngtem nung yimten yimsusuba bangdak nungi shir loktiliba ajungaji telung tashi reprangdangra, teimba ka teraksa aser ochimashi agi sunga lir. Iba teraksa, telemsa, meputepba, tsükchitepba, arishitepba aser ochimashi mapatem ya kong nungi adoker (?)...ta teraji bushidangra, ya tanga kecha agi masü saka Election ajanga adoker. Naga lima yimtsüng aika nung Election agiba shia tashiyim inyakteper, arishiteper, tsükchiteper, ochimashi mapa tapu-tapu inyakteper aser telemsa adoker. Anungji ya kodaser yanglushitsü (?)...ta shisadangra, yimten yimsusur, lokti-lenir, nutsüng-nubur, shirnoki pei temeden vote senyong ayoker/supokrem amshir, parnoki iba ochimashi mapatemji melenshinungdang asen lima ya yanglushitsü. Election meruka magitet tashi asen lima nung loktiliba ajunga raksatsüba/mentetsüba temenen (Social Evils) ya kodanga masüngtetsü. Anungji Naga lima teraksa ya yanglushidi ta bilemra, linuk meimer senso tajung kari danga, mesura lokti-tentet kari danga nungsen metsübu, ochimashi mapa anema, tasü-ita yimjak nung yabo tim masü, yabo majung, yabo melenshitsüla ta ola adoktsüla. Talisa, arogo-i ochimashi mapa anema aser ochimashi inyaker yimten/loktiliba anema tasü-ita ola adoktsü mapang tongja-tongogo. Tanü putu nung shirnoki ochi jembir, ochimashi mapa anema ola adoker parnokjibo aikati sempar, kechiyong asen lima nung ochi pukümer shinga mali kümogo. Ajisüaka, asen lima raksa-a aliba ya yanglushidi ta bilemra, ochimashir sorkar anema, ochimashir yimsusur anema, ochimashir lenirtem anema, arogo-i nungsen metsübu tasü-ita ola adoktsüla. NBCC & ABAM-i anir asen lima teraksa ya yanglushitsü atema 'Clean Election Campaign' tenzüker ta osang kakat nung ngua kanga temulung chia bilemogo. Ano Dimapur nung alir Aor ordain minister-tem iba dak sentakba onuk nung shisa lemsateptsü mensem alitsü jatepba ngua kanga pelaseta bilemogo. Dimapur nung alir tang masü tanga jila/yimtsüng nung alirtem-ia kasaji bilema inyaknungbo kanga ajungtsü. Yisu alima nung alidang pai Yihuda nung sobaliba yimsu-yimbong tamajungtem anema tasü-ita jembir aser melenshidaktsü. Yisu-i Yirusalem tenla kidangi tur tayoker aser talirtem, sen melenertem langpang meküptoktsü aser arizüka yok. Herod aser Pilate chuba tsüngdang ochi temeden atema obendangdak pa kija tasü-ita nokdak. Aji oda, Yisu-i inyakba ama sannukertem, toklang tenzükertem, ordain ministertem aser laishirtemi nungsen metsübu, ochimashi mapatem, lokti temenen anema jembitsüla/inyaksüla, aser alima chubatem dena ochimashi mapatem anema tasü-ita jembitsüla.

Atangji, asen Naga lima teraksa aser ochimashi mapatem ya yanglushidi ta bilemra, tamasa Election meruk-meruka agitetsü lenmang bushitsüla. Naga nung tangar kintemji oda yutsür, asen Ao lima nung danga takok ngua inyaksü atema, yimten bangdak tematiba tashi akaba sabang nung pangzüng takang kar yanglur, iba pangzüng nungji yimten dak sentakba lokti-tentet ajaki tashi agüja nungitsüla. Ajiser, ano iba nungji mungdang lenir, arogotem nung sannuker, toklang tenzüker, tenzüker/tenzüklatem, reverend-tem, laishirtem, parnoki tongti shilem agia semloka/nungita inyaksüla. Atangji, itum lokti-tentet ajunga jagi teka amtepa longjemer tasü-ita inyakra idakji takoktsü lenmang lir ta bilemer. Aji oda, kodang alima tsütsü nungi bilemdangdir, arogo, ordain minister, laishir, parnok dakji tepu maket, parnok dak temzüng-ozüng amshitsüsa kecha tashi mali ta aiben bangpettsü amai jembir, anungji nuburtemi parnokibo makoktsü sudi ta tamang mekateter. Ajisüaka, ano kodang kanga arok-aroka shisadangdir, parnok dakji alima yimten bangdak tashi dang nungi tashi tuluba/tesashiba tenuk agi manguba Tsüngrem tashi ain dena lir, ibajibo alima yimten bangdak tashi dang nungia kanga agi tuluba/tesashiba lir. Anungji asen lima teraksa yanglushitsü atema parnoki dang inyaksi ta mulungtetra, parnoki yanglushitetsüsa parnok dak tashi tulu lir. Kodang mapa tajung ka inyaksü apusodir, idangji teti mojingi tasü-maittsü/tetsübu tanela ka apuoktsür, aser idangji tasü meitetsüsa küli tapu-tapu bilemtetdaksür. Ajisüaka, mojingi tasü maittsü apuoktsüba/temesuzükba olaji mangai, asen lima teraksa yanglushitsü asoshi, arogo-i anir ordain minister-tem aser laishirtemi iba Tsüngrem tashi ain hadir-ji amer, itum ochimashi mapatem anema nungsen metsübu tasü-ita inyaksüla. Asen Naga nung lokti lenirtem dak tashimait kaji kechi mapa sudir suaka, mapang madong tashibo tongpo apua inyaker amai asütsü, saka kodang shitakba inyaksüba mapangji tonga arudir, nungsen marem, tejak marem, tasü meiti zükla-zükla-a küma-adoker. Aji oda, kechi mapa inyaksü temulungtetba tulu nung yimyim ayimzüker apusor, yamaji tatempang kabo tonga mapa küma/takok ngua inyaksü merangtsüla. Aji oda, tema tazütsü-ka inyakdangogo/merangdangogo ta asütsü atemabo tamasayongi amtaka meinyakang tajungba asütsü.

Anungji asen Naga lima yanglushidi ta bilemra, Election Commission inyakyim agi melaba ama 'Free and Fair Election' inyakyim shitak mapa küma inyaksüla. Iba amaji Naga lima yimtsüng/jila ajak nung inyaktetra, Assembly nung amentsü MLA roker (60) pronglaji ochishir adokdaksütsü takoktsü lenmang lir. Kodang yimsusur ochishir nubu tajung adoktaksüdir, asen lima memeteti renloktsü. Kodang yimsusuri ochishia yimsusua alima renloktdaksüdir, memeteti nubur rongnung yimjung alitsü. Kodang Election ya meruk-meruka agitetdir, lokti temenen (Social Evils) senyong pei temeden vote ayokba, supokrem amshiba, yi taluposa ayokba/ajemba, raratepa-züktepba, arishitepba, tsükchitepba, tashiyim/ochimashi mapa tapu-tapu inyaktepba, talisa yimtsüngtem nung Election agiba shia küm-30 atema shilang alangba 'Putu Menden' nung dena mepetmesu adokba itum ajak ya anena-atoktsü. Atangji, Clean Election ya takok ngua inyaktetra, 'Nagaland for Christ' & 'Nagaland Try State' ta alima dang sangdongba, iba yimyim ya asangsang nung ataloktsü. Anungji asen lima yanglushinura, arung kari danga nungsen aremdi, tetla-tetshiba aremdi, takoksa aremdi aser ochimashi anema ola adokdi.

Iba Olemsabang nung lemsaba ken-o aser shisatsü ya iba ocet züluri bilemra ken-o ama tazüngerü angateta agitsü mepishir



October 24, 2021 nü Dimapur Molungyimsen Fellowship (DMF)-i DBIDL, Don Bosco School Campus nung Molungyimsen Yim Kuma Mission Tenzükba Anogomong Sentong nung o jembirtem (temalen abelen nungi) CEM President Rev. Dr. Tia Alinger, Rev. Y Bendang aser Mr. I. Anungba Sanglir aser tesentepertem agiba noksa angur.

Osangtajung ken mejemer nungtugu, Ralph Carmichael süogo

October 25, 2021: Khristan osangtajung ken mejemer, Ralph Carmichael Hombarnü (October 18) nü süogo; pa arrshi küm 94 liasü.

Pa dang "Father of Contemporary Christian Music" ta jalokja liasü.

1960s mapang nung Carmichael-i osangtajung kentem kentenym melenshia liasü, aser tangbo iba dangji "Contemporary Christian Music" ta ajar.

Pa akümüli mapang nung pai osangtajung ken 300 dak tema zülua mejemogo, aser item kentem rongnung "The Savior Is Waiting," "There Is a Quiet Place," "Reach Out to Jesus" aser "He's Everything to Me" densema lir.

Carmichael ajanga osangtajung kentener aika melungjang ajungmesoa liasü, aser parnok rongnung Andraé Crouch, Resurrection Band aser George Beverly Shea nung densema lir. Pa indang music ajanga ajungmesortem rongnung Nat King Cole, The Carpenters, Ella Fitzgerald

asir Elvis Presley nungera densema lir.

Carmichael-isa film aika atema 'music scores' yangluja liasü aser item film rongnung "The Cross and the Switchblade," "4D Man" aser "The Blob," densema lir.

1968 küm Carmichael-i Light Records & Lexicon Music Publishing tenzuka liasü, aser ibaji Khristan osangtajung kentenertem ajungkettsütsü aser ajungmesotsü nükjiong nung tenzük.

Pa Gospel Music Association nunga Tir inyakogo aser Gospel & Christian music nung pai tongtibang shilem agiogo.

Carmichael ya 1927 küm May 27 nü aso. Pa ya Pentecostal sayutsüngir ka jabaso liasü, saka tebei alima kentem angatsü atema-a pa nem temelaba agüja liasü.

Pa Southern California Bible College (tangbo Vanguard University ta melenogo) nung azünga mapang nung pai tebur temeja pezü akümba telok ka tenteta liasü. Par teloki

osangtajung kentem aser contemporary jazz na meyoktepa ken mejema aten. Pa arrshi küm 20 tema asüba mapang nung school music department nunga pa tekolak liasü.

1951 küm Carmichael-i Emmy Award ngua liasü, küm aika sülen 1985 küm pa Gospel Music Hall of Fame nung shim aser 2001 küm National Religious Broadcasters Hall of Fame nunga shima liasü.

"Ralph-i pa taküm tajungtiba nung jangratema liogo. Pai ken kanga meim aser kentemji pa tanelai ajungmesoba kentem liasü. Pai par kibong aser medemertem kanga aneplua meim. Pa dak sasapela liasü, temeim liasü aser asayamenü meimer ka liasü; pa ajururtem ajak pai puadok. Ajak dang nungi tali pai Kibuba Yisu Khrista dak tamang aka," ta sangdong ka ajanga metetdaksü.

Carmichael-i pa kinüngtsü den tanurtem, semchirtem aser tanabuba semchir aika toktsür alima nungi pilaogo.

Yisu nütsüng ana aliba kimong nung yangluba Tenla ki ngutetogo



October 24, 2021: Israel nung akhidang aliba Tenla ki ka ngutetogo, aser iba Tenla kiji Yisu Khristar nütsüng ana aliba kimong nung yangluba liasü ta kuli aika ngutetogo, ta tawa archaeologist temi metetdaksü.

El-Araj nung ali tua bushisüngdanga mapang nung 'mosaic' atem ngutet; iba tesemji akhidang Laishiba nung aliba yim- Bethsaida tesem nung lir. Iba yimtsüng ya küm 1,500 dak temalen liasü, aser iba tesem nungji nütsüngtem indang Tenla ki liasü, ta maneni kuli aika

nguteter, ta archaeologist temi metetdaksü.

Byzantine mapang nung raksabaji mezüng 2019 küm Kinneret Academic College of the Galilee nungi archaeologist temi nguteta liasü. Iba kiojenji akhidang aliba nungtugu Tenla ki indang asü masüar jangjatsü atema parnoki küm aika bushisüngdanga aruogo.

725AD mapang nung züluba puti otsü aika bushisüngdangogo, ajisüaka nütsüngtem indang Tenla ki asü masüar mejangjai aru.

Archaeologists- Steven Notley aser Mordechai Aviam natibo parnoki ngutetba kiojenji akhidang aliba Tenla ki indang lir, aser iba Tenla kiji küm 1,200 tejaklen menoknok sashia anokba mapang raksatsü, aser tang tesüsa mosaic atem anguba ajanga kuli maneni jangjar, ta metetdaksü.

"Onoki anüdoklen tsütsü kiojen nung ajenloka züluba ana ngutet aser tilaba nungji deacon ka aser building project ka indang shia lir. Tuluba nungji putir ka aser kiojen ka tanaben yanglushiba indang zülua lir," ta Aviam-i metetdaksü.

Iba Tenla ki aliba tesemji Galilee tzüym anasa lir. Galilee tzüym nung Yisu Khristai sayatenya mapa aika inyaka liasü, item rongnung nisung 5,000 dak tema chiyungdaksüba aser tzü-ma nung jajaba densema lir.

Puti otsü record nung shia aliba agi, iba Tenla kiji Yisu nütsüng Peter aser Andre na aliba kimong nung yanglu.

ANO GO ABEN TSÜNGREM DEN

Asenok ajak tesayurtem lir

Tekülem Kolosi 3:12-25

Shisatsü ajak nung medemer o medemer na tenüngsang ken aser temeshi ken aser tanela ken agi sayua ajungshiang aser nenok temulung nung taochi ken agi Tsüngrem dang tenang. Kolosi 3:16

Yisu sülen anidaker shia taküm tepiyong tangazüker dang masü, saka tangar dang sayurtemi asütsüla. Tsüngremi Israel nung teburtem aser tetsürtem dang parnok chirnurtem dang Pai melaba ozüng kümdanga sayutsü ashi. Mathi kaket tenyaba mapa tuluji pastor aser tesayurtem asoshi dang masü. Efesa aser Kolosi shiti nung tanelaren aintsü asoshi arogo telungjem nung züngsem ajakji tesayur ta zülü.

Telok tekülem nung asenoki kati ka dang sayur. Lai nungi lemsateper, committee nung, lanur telok nung kati ka dang sayur. Ano asenoki takok tamakok anguba lenmang ajanga sayur; asenoki inyakba lenmang, asenoki bilemba aser asen tejangraba arishiba lenmang ajanga sayutsü akok. Atangjichila nung asenoki kar dangbosa sayur.

Tanü asenok dangi arurtem dang nai aser ni kechi sayur? Lanurtem nem asenok tanelaren kechi tesangwa agütsür? Taintem den inyakdang asenoki parnok lemag nung tashi itdaksür asü, tezüdangdaksür?

Asenoki O aser temeshi mapa ajanga sayutsü Tanela Temeshi dak metalokdi (Lk. 12:12) idangji asenoki tangar dang sayutetsü. Aser kodang asenoki Tsüngrem O jembitsü taküm kuli nung tamakok ngudir, tangar tashi itdaksütsü mokoklir, majungshitet lir, mesüra Tsüngrem temeim lemsatepba nung tamakok ngudir asenok Yisu Khrista dak reprangdi kechiaser Pa tesayur tulutiba dang masü, saka Pai kangki nung asen tamakok ajak aben. Pa dak asenok temenen tatokba aka aser apusotsü asoshi tashi tasen angu.

Temeim, tangar dang sayutsü onok tesayur tajung kümjang. O aser mapa nung Ne temeim lemsateptsü yariang. Amen.

Hindu putir kati India nung Khristantem tepsettsü ajungshi



'Stop Religious Conversions' rally nung Hindu nung putir, Swami Parmatmanand - i jembidang tangokba noksa nung angur.

October 1, 2021 nü rally ka nung jembidang Swami Parmatmanand-i tamangba yimsü meyipdaksüba nung shilem agir Khristantem tepsettsüla, ta ashi. Iba sentong nungji Ramvihar Netam, Nand Kumar Sai aser Anurag Singh Deo nung densema BJP lenirtema aika liasü. "Tamangba yimsü meyipdaksürtem tekolak tangzuka tepsetang. Ni putir ka süaka ni tesempa proker, ta nenoki ashitsüa akok, ajisüaka khenkhenbo mi jangrudaksütsüji tongtibang, ner ki, kiyong aser yimdaki arurtem dang tai matoktsüla," ta pai ashi.

Parmatmanand ya Chhattisgarh nung Hindutva lenirtem rongnung kanga nungtugu putir ka aser pai mapang shia minority tem anema jembir. Taoba mapang nunga pai nashi shibelenertem tepsettsü atema ajungshia liasü.

October 1 nü 'Stop Religious Conversions' onük nung ayongzükba rally ji Sarwa Sanatan Hindu Raksha Manch-i ketdangsüa agi.

Tesüiba ita ishika tsüngda state nung BJP lenirtem aser Hindutva lenirtemi yimtenren tsütsü tajangzük angutsü atema tamangba yimsü meyipdaksüba anema jembiba den külemi minority tem anema jembir.

October 25, 2021: Chhattisgarh state nung lokti senden ka nung Hindu nung putir kati Khristantem tekolak tangzuka tepsettsü ayongzük; iba sentong nungji Bharatiya Janata Party (BJP) züngsemtem densema liasü.

Hindu putir kati item ama o jembibaji ajanga state nung Khristantem anema inyakba kanga bulua akümtsü ta Chhattisgarh nung aliba Khristantemi tsübur, ta International Christian Concern (ICC)-i metetdaksü.

OLONG PAITEP # 5977

1			2			3			4	
			5		6		7			
8										
			9							
	10									
									11	12
			13				14			
15						16				

- | | | | |
|--|-------|-----------------------------|-------|
| TIPILEN | | LANGTSÜNGLEN | |
| 1. Anezükdak ki | - (5) | 1. Reprangdaksü | - (4) |
| 3. Asür mangyimba | - (5) | 2. ___ ur | - (3) |
| 5. Temulung nung shisadang | - (5) | 4. Kiojen yangludak | - (6) |
| 8. T ___ lu | - (3) | 6. _____ ait | - (7) |
| 10. Takdang temalen | - (9) | 7. Nagaland nung ayong ka | - (5) |
| 11. Tesa ___ a | - (3) | 9. Küm kasa purtem | - (5) |
| 13. Ajungbena temulungjang tongtonglatsü atu | - (5) | 10. Tetsüng tajemetdak | - (6) |
| 15. Tejen lai nung tesayur | - (5) | 12. ___ adenshi | - (4) |
| 16. Tsüngsak-mopung | - (5) | 14. Tsünüsenbongtsü adokdak | - (3) |

OLONG PAITEP # 5976 TELANGZÜBA

- | | | | |
|---|--|--|--|
| TIPILEN : | | LANGTSÜNGLEN : | |
| 1. Kasa, 6. Rangben, 7. Mait, | | 1. Khu, 2. Süjak, 3. Onük, 4. Oba, | |
| 9. Poktet, 11. Ati, 13. Atasa, 16. Rür, | | 5. Anü, 6. Ratet, 7. Mozü, 8. Ita, | |
| 17. Rajang, 20. Lanu, 24. Nüngjem, | | 10. Tar, 12. Tinu, 14. Salem, 15. Aja, | |
| 25. Süra. | | 18. Anünü, 19. Tajü, 21. Ano, 22. Onü, | |
| | | 23. Kua. | |



SOBANGBA O ALOKBA NA ANEMA ALITSÜ TASA ATONGTEPER :

Sobangba : Temba, na tawa ya tejak ashir dang angurato, langka kangshirana?

Alokba : Temba ya ni temang ajunga nguya ngushia dang aruraja, mozü achiyonga kecha temelenshi malia.

Sobangba : Temba, nia na amajidang khangshia aruba nibo ozü tantsüi dang aonung temejangtsü nungya temang ajunga atsüshija Olive oil mezüjaa malis süjaa ta tapu tapu anepalutsür, mapa ajak temerbo süngjema amoa aobaji tasüngnepjibo nia masü ama pungpa pungpaa saker ati.

Alokba : Nür tantsü tang azünga lir mali?

Sobangba : Oh Alokba ati!

Llir : WhatsApp

TANÜBO NAI LANGZÜANG

Q. Koba tentet ajanga Nano Nitrogen Liquid Fertilizer yanglua liasü.
 A. Nano Biotechnology Research Centre B. Indian Medical Association
 C. National Biotechnology Research Centre D. None of the above

===== (Taruba adok nung onoki langzüsü)

YASHIADOK TELANGZÜBA: Virginia

AO OSHI ANGAZÜKDAK:
TANÜ ANGAZÜKTSÜBA OJANG

Lemsa
 (v) balala aküm (create division)
 * Naga nunger telok aika kuma **lemsa**.

Lemsa
 (v) süngjang rangsa (peel)
 * Kütsüi nok techira agi mapuzüngi ka **lemsa**.

NAI-A YA METETTER MA



Honibarnü, Las Vegas kübok Sotheby's Auction nung Pablo Picasso indang art work 11 shi \$108.9 million yong yoka liasü. Spain nunger painter mongin Picasso sor küm 140 ajungba anogomung (25.10.2021) matongdang, Bellagio hotel & casino nung iba auction sentong agia liasü. Picasso indang art auction asüba rongnung "Femme au beret rouge-orange" ("Woman with a red-orange cap") lir aser iba art \$40.5 million yong ayok. Iba art den Picasso indang nungtugu portrait ana - "Homme et enfant" ("Man and child") \$24.4 million aser "Buste d'homme" ("Bust of Man") \$9.5 million yong yokogo. Portrait asem dak alaka, Picasso indang tanga maparen (ceramics aser paper work tem) balala iba auction nung yokogo, ta Twitter nung Sotheby's-i ashi.

SUDOKU # 6018 **TELANGZUBA # 6017**

	2			6			4	2	9	8	7	3	5	1	6		
	3	6			7	9		3	5	6	2	1	9	8	7	4	
	7	1		8			6	1	8	7	5	6	4	2	3	9	
		8	7	5	3		1	4	5	9	4	3	2	8	1	6	7
3	4			8					7	6	8	9	5	1	4	2	3
		5	6	9	4	8	7	3	2	3	1	7	4	6	9	8	5
9		3	5			6			6	1	2	4	9	7	3	5	8
7	5		2		1			8	9	7	3	1	8	5	6	4	2
1			8	3	9			7	8	4	5	6	3	2	7	9	1

OJANG LUTEP # 5563

- NGTAAR :
- KAABA :
- NÜAGIA :
- RANGBREPAPI :
- KÜTAM :
- NGNU :
- SHBUISALU :
- LILTAA :
- BELOKNDENER :
- ADNG :

OJANG LUTEP TELANGZÜBA # 5562

**JUNGA ALIBA MAPANG MEIMTEPA AMAJI MESHIMEJUNG
 MAPANG NUNGA MEIMTEPA ALITSÜLA**

TAN HOPTA ATEMA - KOMA SÜLA ?

Q. Naga nunger yimten tebilemtsü ken o ya India-i, Naga nunger tanga teloktem yutsür, NNPGs telok den dang latet nunga koma süla ?

PM-i Ayushman Bharat Health Infrastructure Mission tenzüksüogo



October 25, 2021 nü Varanasi (Uttar Pradesh) nungi Ato kilonser, Narendra Modi-i Ayushman Bharat Health Infrastructure Mission tenzüksüdang tangokba noksa nung angur.

New Delhi, Mongputeni/ October 25 (Agencies): Hombarnü Ato kilonser, Narendra Modi-i Ayushman Bharat Health Infrastructure Mission scheme tenzüksüogo; iba sentong nung jembidang pai, iba mission ajanga India nungeri health sector dak tamang katettsü aser tangar dak memetaloki litettsü, ta metetdaksü.

Hombarnü Uttar Pradesh nung Ato kilonser, Narendra Modi indang parliamentary constituency Varanasi nungi iba scheme tenzüksüdang pai, iba mission ajanga India nungeri health facilities tajungba akümsü, ta metetdaksü.

"India nung health sector nung kanga tongtibang süa sen indoktsüla ta asenoki jembia

arur. PM Ayushman Bharat Health Infrastructure Mission atema sorkari India nunger nütüsing billion 1.3 taküm anema alitsü asoshi sen indoker," ta pai ashi.

Paisa, iba mission ajanga India nungeri tarutsü nung wara balala anema raraba aser azüoktetba tsütsü tashi itshitsü, ta ashi.

"India nung healthcare facilities majungba asenok ajaki kulisüa nguogo, ajisüaka iba mission ajanga linük tesem ajungalen health facilities tsütsü temelenshi tulu adoktsü," ta pai ashi.

Iba scheme kübok yimtsüing aser yimitem nung health & wellness centers lapokdar, aser item nungji tekaratiba nung tashidak putettsü atema facilities

agütsütsü, ta pai ashi.

"Ayushman Bharat Health Infrastructure Mission ajanga apu laja diagnostics & consultation centres lapoktsü aser tashidak tamajungba makümdang tekaraba nung tashidak putettsü. Onoki district 600 tema nung critical care hospital blocks amenoktsü," ta pai metetdaksü.

Paisa Varanasi nung sen crore 5,200 indang terenlok projects aika semzükja liasü.

Hombarnep Modi-i Siddharthnagar nungi Uttar Pradesh nung medical college 9 semzükja liasü. Medical colleges ji Siddharthnagar, Etah, Hardoi, Pratapgarh, Fatehpur, Deoria, Ghazipur, Mirzapur aser Jaunpur district shia nung kaka lir.

Cong-i medical treatment atema sen lakh 10 tashi agütsütsü: Priyanka

New Delhi, October 25 (Agencies): Sangküm küm tetenzüklen Uttar Pradesh nung assembly election agütsü lia Hombarnü Congress lenir, Priyanka Gandhi Vadra-i, UP assembly election nung Congress-i takok ngura state nung nüburtemi medical treatment agiba atema sen lakh 10 tashi agütsütsü, ta nangzük.

Honibarnü Priyanka-i Uttar Pradesh kübok Barabanki district nungi Congress indang "Pratigya Yatras" tenzükja liasü. Iba kübok party-i tenangzükba tenet sangdongogo, item rongnung aluyimertem dang sentsüh atoktsü aser nisung lakh 20 nem mapa agütsütsü

tenangzükba densema lir.

Hombarnü Priyanka-i Hindi oshi nung twitter ajanga, "Nisung ajaki Uttar Pradesh nung health facilities jenjang kanga mejungi aliba nguogo, aser ibaji corona wara mapang aser tang temang metaba wara mapang sorkari health sector sendokba ajanga lir. Treatment tajung aser jenjang dalang agi agütsütsü nükjidong nung manifesto committee den jembitepba sülen UP Congress-i takok ngura tashidak balala atema treatment agidang indokba atema sen lakh 10 tashi agütsütsü telemtetba agiogo," ta metetdaksü.

Congress-isa, election nung

party-i takok ngura aluyimertem nem wheat aser tsük quintal shia nung sen 2,500 agütsütsü aser mochitzü quintal shia nung sen 400 agütsütsü, ta nangzük.

Party-isa state nung nisung lakh 20 nem mapa agütsütsü, light atsükba bill tesadang agütsütsü aser coronavirus wara mapang nung timtem tulu ajangshiba kibong shia nem sen 25,000 agütsütsü, ta nangzükogo.

Congress-isa UP election nung party ticket shilem 40 bo tetsür candidates nem agütsütsü, Class 12 pass ser alir tetsürtem nem smartphones aser graduate ser alir tetsürtem nem e-scooters agütsütsü, ta nangzükogo.



Panaji, October 25, 2021: Hombarnü Panaji nung Lok Sabha MP Saugata Roy, MP Mahua Moitra, taoba mapang Union Minister Babul Supriyo aser National GTC Vice President Luizinho Faleiro nunger densema Goa Trinamool Congress lenirtemi taoba mapang Goa nung sorkar balalai tim mesüi yimsüsüba anema 'chargesheet' sayaba noksa nung angur.

SKM-i UP election nung BJP anema nokdaksü: Rakesh Tikait

Agra (Uttar Pradesh), takhangba agütsü.

October 25 (Agencies): Narwar-i Agra nung aliba Jagdishpura police station nungi sen lakh 25 auya, ta pa nem tai tonglokja liasü aser October 19 nü pa dang asüngdangyaba mapang nung pa temang tamajungba aküm aser police ket nung lia asü, ta tamalen ketdangsertemi metetdakja liasü.

Narwar'er kibong semdangba sülen osangbenertem den jembidang Tikait-i, "Senotsü teyari agütsüba nunga state sorkari nisung bendanga amshir. Lakhimpur Kheri nung asürtem kinüngertem nembo sen lakh 40-45 agütsü saka sorkari Agra nung asür kibong nembo sen lakh 10 dang agütsü," ta metetdaksü.

"State sorkari Arun'er kibong nem-a sen lakh 40 agütsütsüla. Sorkari nisung b e n d a n g s h i d a n g a mamshitsüla," ta pai ashi.

Paisa Arun Narwar'er kibong nungi züngsem ka nem sorkar mapa agütsütsüla aser pa asüba ken oji judicial nem bushisüngdangdaksütsüla, ta

Narwar-i Agra nung aliba Jagdishpura police station nungi sen lakh 25 auya, ta pa nem tai tonglokja liasü aser October 19 nü pa dang asüngdangyaba mapang nung pa temang tamajungba aküm aser police ket nung lia asü, ta tamalen ketdangsertemi metetdakja liasü.

Aluyimba ozüing tasen asem dak sendakba nung BJP sorkar aija Tikait-i, "Taruba Uttar Pradesh assembly election nung BJP nem vote tagütsü, ta ni aluyimertem dang mepishitsü. Samyukt Kisan Morcha (aluyimertem unions-i akümba tentet)-ia state assembly elections nung BJP anema nokdaksü," ta metetdaksü.

"Onoki ozü candidates metoktepdaksütsü mesüra assembly election nung party shinga pu masemtsü, ajisüaka BJP meyaritsü," ta paisa ashi.

"Aluyimba ozüing tasen asem magien tashi aluyimertemi Centre anema longkak aittsü. Onoki Centre sorkar den ken o jembitsü melunga lir," ta paisa metetdaksü.



October 25, 2021 nü Vigyan Bhawan, New Delhi nung 67buba National Film Awards sentong nung linük tatong Tir, M. Venkaiah Naidu-i film actor Vijay Sethupathi nem award ka agütsüba noksa nung angur. Kasa noksa nung Union Minister Anurag Thakur-a angur.

Army ketdangsertemi linük security aser LAC tensa asadangtsü

New Delhi, October 25 (Agencies): Hombarnü New Delhi nung Army tongti ketdangsertem anogo pezünü senden tenzükogo; iba senden nung Indian Army nung tongti ketdangsertemi Ladakh aser Line of Actual Control (LAC) nung tensa asadangba den linük nung security tsütsü tayongzükba balala asadangtsü, ta osang ka ajanga metetdaksü.

Army commander temisa tawa Jammu & Kashmir Union Territory nung civilian aika tepsetba ajanga tensa raksaba jenjang asadangtsü.

Iba senden nung Army tongti, General MM Naravane leniba nung commander temi anüdoklen Ladakh nung sepaitem terenemshiba jenjang asadangtsü aser Taliban teloki

Afghanistan yimsüsüba ajanga India nung security tsütsü timtem adoktsü asü madoktsüar asadangtsü, ta kasa osang ajanga metetdaksü.

"Tanabuba Army Commanders' Conference 2021 ya New Delhi nung October 25 nungi October 28 tashi amentsü. Army Commanders' senden ya küm shia anaben- April aser October ita na nung ayongzükba agir," ta Army sangdong ka ajanga metetdaksü.

Kasa senden nung Union Defence minister, Rajnath Singh-ia jembitsü. Pa dak alia Chief of Defence Staff General Bipin Rawat, Navy Chief Admiral Karambir Singh aser Chief of Air Staff Air Chief Marshal VR Chaudhari nungeria jembitsü.



Xinhua News Agency ajanga sayaba noksa ka nung China northwest tsütsü Ningxia Hui Autonomous Region kübok Xixia District nung alirtem coronavirus tendangba angur. Gansu nung COVID-19 cases tasen jangjatetba sülen yangji tourist sites ajunga shibangogo. Gansu ya akhi Silk Road nung lir aser iba tesem ya raliwalirtem atema kanga nungtugu lir.

Taliban-i Putin sentong pelashishia agizük

Moscow, Mongputeni/October 25 (Agencies): Russia tir Vladimir Putin-i Taliban pur kiralongrar list nungi agintsü akok ta ashiba Taliban-i pelashishia agizükogo. International Valdai Club senden ka nung o jembiba mapang Putin-i, kiralongrar teloktem list nungi Taliban movement agintsü akok, ta ashi. Ajsüsüaka pai, iba telemtetba ya United Nations jenjang nungang inyaksü akoktsü, ta ashiba Russian News Agency TASS-i metetdaksü.

Afghan Foreign Ministry otongdar Abdul Qahar Balkhi-i

Dobarnü ashiba agi, "IEA lenirtem blacklist nungi agintsüba indang Russia tir Vladimir Putin-i jembiba Islamic Emirate of Afghanistan indang Ministry of Foreign Affairs-i pelashishia agizükur." "Rara tembangogo anungji alima linüktemi Afghanistan den tesendaktep dak sendakba nung parnok tebilemba melenshitsu. Onoki kati ka dak metaloktepba tebilemdangba nung alima kintem den tesendaktep yuner," ta Taliban otongdar-i tweet asü. Putin-isa, extremist teloktem list nungi Taliban

agintsü atema Russia-i asadangdar, ta ashi. "Ajaki Taliban puri Afghanistan nung tensa tajungba kümdaktsütsü imlar," ta Putin-i ashi. Taliban puri August ita Kabul atsüing aser September ita Islamic Emirate of Afghanistan indang interim sorkar ka sangdonga liasü. Taliban-i parnok linüktem nem parnok agizükdaksütsü atema merangdanga arudar. Ajsüsüaka alima kintemi, Taliban-i tenengzükba agütsüba ajaka benoka inyakba sülenang parnok agizüktsü ta jangja jangja metetdaksüogo.

Bangladesh nung Hindu nunger amaktsü rongmesor anati aibelen nangzükogo

Dhaka, Mongputeni/October 25 (Agencies): Tawa Bangladesh nung Hindu nunger amaktsü atema social media nung rongmesoba dak sendakba nung nisung anati shilem agiba nangzükogo, ta okadak ketdangsür kati ashi. Shaikat Mandal-i Deobarnü magistrate ka matsüingdang pa indang Facebook post ajanga Rangpur, Pirganj sub-district nung October 17 nü Durga Puja benjung mapang mepetmesü atalok, ta nangzükba liasü. Mandal nem teyari agütsüsang Rabiul Islam ya arishi küm 36 tain cleric ka lir, shiba rakzürakdemba aser lokti rongmesoba atema aitsüogo. "Shaikat Mandal aser pa nem teyari agütsüsang Rabiul Isam nati Rangpur nung senior judicial magistrate Delwar Hossain matsüingdang tena aibelen nangzükogo," ta okadak ketdangsürisa osangbenertem dang ashi. Tena Gazipur nung Hokolbarnü apu aser Digital Security Act kübok aija ken o benokogo. Mandal ya Rangpur's Carmichael College nung philosophy department kaketshir ka liasü aser pa apuba sülen ruling Awami League

indang student wing Chhatra League nungi mintokogo. Pai, social media nung follower tem timba kümdaktsütsü atema tashishitsü aketba osang Facebook nung upload süa liasü, ta Rapid Action Battalion ketdangsür kati ashi. Islam-i Mandal nem teyari agüja Hokolbarnü loudspeaker ajanga iba osang yimdaklirtem nem sangokja liasü, ta ketdangsürisa ashi. Hindu nunger kati tamangba yimsü dak sendakba osang Facebook nung prokshi ta olulu prokshiba ajanga Pirganj nung azütokshia mepetmesü adok. Police-i ashiba agi, October 17 nü mepetmesü adokba sülen Hindu nunger ki 70 shi rongtoktsüogo. Iba ken o dak sendakba nung nisung teneti parnok aibelen nangzükogo aser iba den tang tashi nung nisung 683 puogo aser nisung 24,000 anema ken o 70 dak tema benoka lir. October 13 nü Social media nung olulu osang prokshiba sülen Bangladesh nung Hindu nungertem Durga Puja amungba mapang maka liasü. Iba tatalokba ya United Nations densema lokti tentet balala aikati aitsüogo.

Sudan PM puogo, mitkari state of emergency sangdong



Abdalla Hamdok

Khartoum, Mongputeni/Oct. 25 (Agencies): Sudan mitkari tashiyim amshia sorkar atsüingdoktsü merangba sentong memolungba ajanga Ato Kilonser Abdalla Hamdok ya mejangjaba tesem kati anir oa ki ka nung pua yua lir, ta information ministry ajanga ashi. Sudan nung tang yimsü tesüdak telok nung mendenpuba, General Abdel Fattah al-Burhan-i mapang tatsüka lir transitional government aser sovereign council shibangtsüba sangdong aser linük tesem ajunga nung state of emergency sangdonga liasü. Taoba ita mitkari sorkar atsüingdoktsü merangba nung tamakok ajuruba sülen Sudan nung mitkar aser civilian teloktem tsüingta tai tongloksütepa arua liasü. Linük nung mapang talangka yimsü süa arusang Omar al-Bashir menden laoba sülen telok ana tsüingta ya tashi lemsatepa yimsü asütsü liasü. Tashi lemsatepa yimsü

asüba council nung tekolakba aser mitkar tanishir Abdel Fattah al-Burhan-i linük tesem ajunga nung state of emergency sangdong aser transitional sovereign council aser sorkar anentsüba metetdaksü. Transitional government atema 2019 tezüingzüktepa nung civilian aser mitkar lenir tsüingta tashi kasa lemsar yimsü asütsü renema aliba ya timtem ang akum aser yimjung tesunep amokmerener ka ama kumogo, ta pai ashi. Constitutional declaration nung shia aliba ama mitkari linük kumzükba ayutsü nungdak ta pai shia tashi lemsatepa yimsü asüba council aser sorkar anenba sangdonga liasü. Paisa state governor tem mapa nungi anentsüba metetdaksü aser elections ya 2023 küm July ita agitsü, ta ashi. Security forces temi transitional government nung civilian lenirtem apuba sülen Sudan Ato Kilonser Abdalla Hamdok indang office ajanga nüburtem dang yimti-yimtung

nung longkak aittsü sangdonga liasü. "Auür ket nungi pei tashi temeden meyiba agitsü atema Sudan nüburtemi yimjung yimya ajunga amshia longkak aittsü ayongzükur," ta Hamdok indang office ajanga sangdong ka nung ashi. Sudanese civilian sovereign council züingsem Mohammed Hassan Eltaishi-i pa indang Facebook page nung, Hombarnü mitkari tashiyim amshia sorkar atsüingdokba ya yimtenren tsütsü tamachi mapa ka lir aser azüjang tatembangba metsük tashi anema nokdaksü, ta ashi. Mitkari sorkari atsüingdoktsü merangba anema Khartoum nung longkak aitba mapang nisung 12 yiru, ta Sudanese Doctors Committee ajanga Facebook nung metetdaksü. Khartoum nung mitkar indang headquarters anasa longkak aiter dak prangbong agi akhar, ta Sudan information ministry sangdong ka ajanga ashi. Aji masüidang parnoki par indang Facebook page nung, Ato Kilonser Abdalla Hamdok-i ayongzükba ama longkak aiter nisung meyririjang aika yimtung nung adoka lir, ta shia liasü. Sudan tensa ya ngua, Arab League-i khuret abenba indang sangdong ka agüja liasü. Züingsem 22 aliba bloc indang Secretary-General, Ahmed Aboul Gheit-i telok ajak dang August 2019 nung meyonngem agüja aliba constitutional declaration sülen

anidaksü ajungshia liasü, koba nung civilian nem yimsü südakja democratic elections agitsü atema lenmang lapoktsütsü shia lir. "Jembishinü makai angatetteptsü khuret kecha mali. Telemtetba aser tezüingzüktepa agia alibatem akumtsüputsü kanga tongtipang lir aser Sudan nung tesunep anokshitsütsü maparen kecha meinyaktsüla," ta Aboul Gheit-i ashi. Sudan security forces-i Ato Kilonser Abdalla Hamdok densema civilian lenirtem apuba ya magizükteter, ta United Nations-ia ola adokogo. "Mitkartemi sorkar atsüingdokba aser Sudan yimtenren temelenshi nung tetsükdaksü agütsütsü merangba osang angashia temolung shiranger. Ato Kilonser, sorkar ketdangsür aser yimten yimsüsürtem apuba ya magizükteter," ta UN special representative to Sudan, Volker Perthes-i ashi. "Ozüng alema pua aliba mesüra house arrest nung yua alirtem tekeratiba nung chiochtsü asoshi security forces dang ajungshir," ta pai Twitter nung sangdonga liasü. Sudan People's Liberation Movement-North (SPLM-N) indang deputy chairman, Yasir Arman ya par kidang nungi pua bener ao, ta pa indang Twitter account ajanga ashir. Arman'er telungpur teloki 2020 küm sorkar den yimjung tezüingzüktepa ka yangluba sülen

pa ya Ato Kilonser Abdalla Hamdok indang advisor ka liasü. European Union indang foreign affairs tekolakba, Josep Borrell-ia Twitter nung northeast African linük nung inyaksangshiba osangtsüsang agitepba mapang lir, ta shia liasü. Mitkartemi sorkar atsüingdokba nung shilem ka ama sepaitemi Sudan state broadcaster indang headquarters telungi aita yangji inyaker kar apu, ta information ministry ajanga ashi. "Mitkartem Omdurman nung aliba TV aser radio headquarters telungi aita staff tem apu," ta ministry ajanga Facebook nung sangdong. Sudan nung telecommunication nung tenokdangba agütsüogo, anungji nüburtem den osang agiteptsü kanga tasak kumogo, ta Khartoum nungi osangbener kati ashi. "Mitkartemi Khartoum yimti leni aoba lenmang aser apu ajunga nokdangogo. Lenmang shibangtsü totuyuba agütsüoo ta mitkartemi ashi," ta osangbenerisa ashi. Mitkari tashiyim amshia sorkar atsüingdoktsü merangba busema osang ka sangdongtsü memolungba yong Ato Kilonser Abdalla Hamdok ya mejangjaba tesem kati anir oa, ta information ministry ajanga ashi. Sudan nung mitkartemi sorkar atsüingdokba osang angashia saksalema lir, ta United States-ia sangdong ka nung ashi.

CAB Mon-i senden ka ayongzük



Mon, Mongputeni/October 25, 2021: Deputy Commissioner Mon, Conference Hall nung Childline Advisory Board Mon ajanga ayongba senden nung shilem agirtem külemi tangokba noksa ka yangi angur.

Mon, Mongputeni/October 25, 2021 (TYO): Hokolbarnü (22.10.2021) Childline Advisory Board Mon-i Deputy Commissioner Mon indang Conference Hall nung senden ka ayongzük. Iba senden nung DC Mon, Thavaseelan K, IAS menden liasü.

Iba senden nung Nodal Director & Governing Board Member, Childline India Foundation, Subononba Longkumer-i Childline 1098 indang telok dang metetdaksü.

Subononba Longkumer-i, Childline 1098 indang services, inyakyimtem, onük balala aser

asalentongtem metetdakja liasü. Pai ashiba agi, tesüiba küm 25 nungi Nagaland kübok District 6 densema District 602 nung iba service (Childline 1098) tenzükja achaayanga arudar. Tanur kümzükba dak alia, Childline 1098 ajanga counseling services agütsür.

Iba service ajanga ajak ajangzüksü asoshi Childline Mon mapatong maneni nungitta yaritsü atema pai züngsemtem ayongzük.

Züngsemtemi iba senden nung onük balala benoka olemtepogo, kong 'wall painting' ajanga sorkar office

tem nung Childline indang asalentongtem metetdaksütsü; DLSA ajanga Childline Mon atema lawyer shimtsü; Police station tem nung Childline den tesendaktep tajung ayutsü; Childline Mon atema rescue van alitsü, awareness aser sensitization sentong tem achaayanga agitsü indang onük balala jembigo.

Kasa senden nung, Deputy Commissioner Mon-i NCSR 2020-21 tenzüksü aser Childline Mon ajanga Mon nung alir tanurtem indang telok dang metetdaksü, ta kasa sangdong nung shia lir.

Pughoboto SDPDB senden nung Agri. Dept. inyakyimtem metetdaksü

Pughoboto, Mongputeni/October 25, 2021 (TYO): Hombarnü, DB Court Hall, Pughoboto nung ita shia ayongba Pughoboto Sub-Division Planning & Development Board senden menogo. Iba senden nung SDPDB Vice Chairman & MLA Y.Vikheho Swu menden liasü, ta sangdong ajanga metetdaksü.

Iba senden nung, Vice Chairman Vikheho-i EE PWD, Pughoboto dang November tashi nung arem merüktetsü aser NBCC küm tatem senden, kong Nagaland tesem ajanga nungi teshimtem nübutem Sangküm küm tetenzüklen Ghatashi town tonga arutsü imlar, iba senden matongdang pei pei aliba tesem nung kima yimdong/lenmang tem merüktetta aser yanglushitsü asoshi tetuyuba agütsüogo.

Pughoboto sub division kübok lenzükba maparen balala takok ngua inyakba atema Vikheho-i Agriculture department dang pelaba metetdaksü aser 'production' züintsü atema meratem agiba dang masü saka marketing nung rangloker inyaksü ayongzük; aser marketing shed den facility balala atema subsidy kar atema lenmang bushitsü asoshi pai department ajungshia liasü.

Iba senden nung, SDAO Myanthung Patton-i, department inyakyimtem dak sendakba nung PMKSY 2020-21 kübok integrated farming system, Water Harvesting Structures, Irrigation channels aser TRC indang metetdaksü.

Iba den külemi, Patton-isa RAD kübok WHS, IFS, Fishery based farming aser farm atema lenmangtem; RKVY kübok Power tiller path,

Integrated Farming system & manuring; SMSP kübok 'groundnut' aser 'soyabean' lu ayimba aser NFSM kübok coarse cereals, pulses, oil seeds nung inyakyimtem sayuba maparen telok dang metetdakja liasü.

MLA-isa, küm pungo plan atema terenlok maparen ajak atema asalentongtem sorkar dangi yoktsü asoshi department dang metetdaksüogo. Iba mapatong ya 15 Finance Commission kübok achaayanga inyaker, ta pai ashi.

Maneni, kasa senden nung, Pughoboto mini secretariat yanglutsü atema ali kibur nem temenok agütsütsü asoshi Sorkar dangi tanaben shidi yoktsü asoshi teloki bangjemtep, kong Solar plant tuluka amenokba den office kar yangluogo, ta sangdong nung shia lir.

MENUNGRA BILEMTETER

ASÜR SOSANGMEREN LKR
TASÜBA ANOGO : 26.10.2020

Temeim oba, nai iba akümlü toktsür or tanü küm ka ajungba anogo nung ne temeim, taremsük, ajemalu aser ne tamang sarasadem onoki menungra bilemteter.

- Temeim kinungtsü,
chirnurtem & semchirtem



--- SANGDONGER ---

Chuchuyimpang Mongoya Prayer Garden nung 29th to 31st Oct 2021, anogo asem Healing Crusade sentong renema lir. Anungji nübur kar danga shi aser tanela nung taneptsü aginüa lira arua Tsüngremer temoatsü agitsü Arogo ajanga lemsateper. Iba sentong mapang sorkar tetuyuba SoP amshitsü.

Tongteprateptsü atema : M- 9856486841 / 8258802047
Mapang - Aonung : 5:00 PM. Anepdang : 9:00 AM.
Nikongdang : 12:00 PM

IN THE GAUHATI HIGH COURT
(THE HIGH COURT OF ASSAM, NAGALAND, MIZORAM AND
ARUNACHAL PRADESH)
KOHIMA BENCH
MAC APPEAL NO. 01 OF 2020

The Oriental Insurance Co. Ltd. Appellant

- Versus-

Shri Omenchiba & 3 others Respondents

To

1 Shri I Lanuchiba Aier,
R/O H/NO 66A
Alempang Ward,
Mokokchung, NL
Nagaland (Driver of vehicle No. 02/C 1558)

NOTICE

Please take notice that the above appeal has been filed by the appellant (Oriental Insurance Co. Ltd.), wherein you have been impleaded as respondent No.4.

You are therefore directed to appear before this Court on 8th November 2021 when the matter is listed in person or by pleader duly instructed and able to answer all material questions relating to the case. The matter will be heard soon thereafter as business of the Court may permit but no notice of such further date shall be given.

Take notice that in default of your appearance on the date mentioned above the case will be heard and determined in your absence.

Signed and sealed by the Order of the Court on this the 19th day of October 2021.

Deputy Registrar,
Gauhati High Court, Kohima Bench
Kohima, Nagaland.

ALI AYOKTSÜ LIR

Nihoto Village near Naga United Village. Aliji available, Sq.ft nung Rs. 150/- Contact: 9362937411

Mon DPDB senden menogo



Mon, Mongputeni/October 25, 2021 (TYO): Hokolbarnü (22.10.2021) Deputy

Commissioner Mon, Office indang Conference Hall nung Mon District Planning & Development Board senden agiogo. Iba senden nung DC Mon, Thavaseelan K, IAS meden liasü, ta sangdong ajanga metetdaksü.

Iba senden nung, Board-i Sheanghah Lokyo yimtsüng nung Govt. Primary School ka lapoktsü atema onüktembenoka jemi. Inter-departmental sports tournament ayongzüksü aser Officers' Club, Mon nung

Officers' Lounge semzüksü asoshi Board-i asadangshia jembigo.

Kasa senden nung, District nung Department kar indang inyakyimtem powerpoint ajanga telok dang metetdaksü. Iba mapang, Soil & Water Conservation atema DSCO Mon, Chumei Yanlem; Art & Culture atema ARO Mon, W. Kaiwang Konyak aser Sericulture Department atema ASO Mon, Keneizetuo Khro nungeri pei pei Department nung inyakyimtem telok dang metetdakja liasü, ta kasa sangdong nung shia lir.

GOVERNMENT OF NAGALAND DIRECTORATE OF SCHOOL EDUCATION NAGALAND : : KOHIMA

NO.ED/SCH/RIMC/EE/2017-18

Dated 25th Oct'2021

ADVERTISEMENT

Advertisement for Admission to Class VIII in Rashtriya Indian Military College (RIMC), Dehradun, for Girl Students for July 2022 term to be conducted on 18th December 2021(Friday).

- Only girls are eligible to apply for admission to the RIMC, Dehradun. Candidates appearing for the above exam should not be less than 11 1/2yrs (eleven and half) in age but should not have been attained the age of 13 yrs as on 01 July 2022 i.e. they should not be born earlier than 2nd July 2009 and not later than 1st January 2011.
- Candidates should either be studying in class VII or Pass Class VII from any recognised school at the time of admission to the RIMC i.e. 1st July 2022.
- The written part of the examination will consist of three papers namely Mathematics (0930-1100hrs), General Knowledge (1200-1300hrs) and English (1430-1630hrs) shall be conducted on 18th December 2021(Friday). The Oral interview will be intimated later for only those candidates who secure 50% mark in all the papers in the written Exam.
- Application form Cum Prospectus and booklet of old Question papers can be obtained from The Rastriya Indian Military College, GarhiCantt, Dehradun, Uttarakhand, Pin 248003, through online payment on RIMC website www.rimc.gov.in of Rs 600/- for General candidate and Rs 555/- for SC/ST candidates.
- Application on prescribed form accompanied by 2 passport size photographs, Domicile certificate, Photocopy of Aadhar Card(both sides) Birth certificate issued by Municipal Corporation, ST/SC certificate and certificate from the Principal of the school in original and photograph on it attested stating date of birth and class studying, should reach the Directorate of School Education on or before 15th November 2021.

(SHANAVAS C) IAS
Principal Director

Syed Mushtaq Ali Trophy atema Nagaland team sangdongogo



Dimapur, Mongputeni/October 25 (TYO): Syed Mushtaq Ali Trophy 2021-22 nung asayatsü atema Nagaland Cricket Association-i Senior Mens Cricket Team list sangdongogo.

Asayatem yamai alitsü:

- ♦ Jonathan Rongsen (Captain)
- ♦ Hokaito Zhimomi (Vice Captain)
- ♦ Imliwati Lemtur
- ♦ Sedezhalie Rupreo
- ♦ Nagaho Chishi
- ♦ Joshua Ben Ozükum
- ♦ Hem Bahadur Chetri
- ♦ Nzanthung
- ♦ Merenkaba Jamir

- ♦ Khreivitsso Kense
- ♦ Tahmeed Rahman
- ♦ Mungkham Phom
- ♦ Jalaludin Laskar
- ♦ Neehal Rai
- ♦ I Temjentoshi Jamir
- ♦ Henry Kent
- ♦ Santosh Kumar Magato
- ♦ Shrikant Mundhe (guest player)
- ♦ Chetan Bist (guest player)

- ♦ Abu Nechim Ahmed (guest player)

Support staff

- ♦ Nehal Ahmad (team manager & Asst coach)
- ♦ Kawaljeet Singh (Team coach)
- ♦ Arzoo Raj (Team fielding coach S & C Coach)
- ♦ Krishna Prabhu (Team physio)

MATCH FIXTURE:

04-11-2021	: Nagaland vs Manipur
05-11-2021	: Nagaland vs Vidarbha
06-11-2021	: Nagaland vs Mizoram
08-11-2021	: Nagaland vs Arunachal Pradesh
09-11-2021	: Nagaland vs Tripura

Asayatem ajak Vijayawada nung asayatsü.

NSF Trophy: FIFA FC aser ANTA nati takok angu

Kohima, Mongputeni/October 25 (TYO): 21buba NSF Martyrs' Memorial Tournament nung October 25 nü taküm iba asayamung nung mezüngbuba shilem agiba team FIFA Football Club-i iba asayamung aneben tashi koker aliba Tangkhul Katamnao Saklong (TKS) team tanabuba round nung tsükdaktsüogo aser All Nagaland Taxi Association-ia parnok tata asaya kokogo. Iba asayamung ya Angami Students' Union-i ayongzüka Indira Gandhi Stadium, Kohima nung tang tasayadak lir.

October 25 nü mezüngbuba asaya nung FIFA FC-i tesülen nungi atur goal 4-3 agi TKS team kokogo. TSK-i iba asayamung 1992 aser 2002 küm koker lir.

Asaya nung TSK puri Thotngayung ajanga asaya tenzüker minute 2buba nung mezüngbuba goal idaktsü aser ano minute 17buba nung Yami-i parnok atema tanabuba goal idaktsü. Ajsiüaka mapa tatsüka dang lir minute 18buba nung FIFA FC nungi asayar Laishram-i goal ka idaktsü aser minute 22buba nung Moirangthem-i tanabuba goal idakja kasasa aküm. Iba sülen ano FIFA nungisa Ngugoulal-i minute 34buba nung goal tasembuba idaktsür asaya mezüngbuba shilem tembang.

Asaya tanabuba shilem nung maneni minute 63buba nung TKS atema Yami-i goal ka idakja goal kasasa aküm, ajsiüaka Ngugoulal-i ano FIFA

atema mapang apuloktsür asayaba mapang goal pezübuba idakja parnoki asaya akok

Asaya tanabuba nung All Nagaland Taxi Association (ANTA)-i goal 2-1 agi Rikhu Warriors madak takok angu. Asaya nung mezüngbuba goal ANTA nungi asayar Rovizhalie-i minute 26buba nung idaktsü aser iba sülen Jenpu-i penalty ka ajanga minute 29buba nung ANTA atema tanabuba goal idaktsü aser goal 2-0 agi parnok tejakdang aküm. Rikhu Warriors atema goal ka ya Serakho Lohe-i minute 45buba nung idakja liasü.

October 26 nü asayatem:

1. A. Yhome FC vs Tsiesema Basa Youth @ 12.30 PM
2. United Brothers FC Vs Hurricane Boys @ 2:00 pm

Lahiru Kumara aser Liton Das na dang senchi achi

Dubai, Mongputeni/October 25 (Agencies): Sri Lanka pacer Lahiru Kumara aser Bangladesh batter Liton Das na dang Hombarnü tena indang match fees shilem 25 aser 15 ta senchi chiogo. T20 World Cup Super 12 fixture nung linük ana tsüngda asayaba mapang ICC inyakyim sülen manidakba atema tena merenshiogo.

Deobarnü Sharja nung linük ana tsüngda asayaba mapang o langtepba sülen tena tekasangshiteptsü asoshi apusoa liasü aser iba ajanga umpire aser tanga asayartemi tena nokdangtsüsa aküm.

"Sri Lankan bowler Lahiru Kumara aser Bangladeshi batter Liton Das Kumar nati ICC Code of Conduct for Players and Player Support Personnel level 1 nung aibelenba atema senchi chiogo,"

ta ICC sangdong ka ajanga metetdaktsü.

"Kumar dang pa indang match fee shilem 25 senchi achiba den demerit point ka agütsü. Das dang pa indang match fee shilem 15 senchi achi aser demerit point ka agütsü," ta ICC-i ashi.

Kumara-i, ICC Code of Conduct for players and player support personnel Article 2.5 nung aibelen koba "using language, actions or gestures which disparage, or which could provoke an aggressive reaction from a batter upon his/her dismissal during an international match," dak sendaka lir.

Kasa mapang nung Das-i asaya yimya anema inyaka liasü. Bangladesh nung batting amenba mapang Das out asüba sülen iba ya ataloka liasü.

Das out sütsüba sülen

Kumara-i pa anasa ao aser pa rongmesodaktsütsüsa o shia liasü.

Kumara-i pa dang o ashiba süeln Das-i meyiper telangzüba agütsü, koba spirit of cricket anema liasü.

Match referee Javagal Srinath-i sanction ya agütsü, koba ICC cricket operations department-i COVID-19 interim playing regulations dak ajemdaker agizüka liasü.

Kumara aser Das napronglai aibelen nangzükogo aser tena nem temerenshi agütsüba dena agizükogo, anungji ken o angadangtsü nüngdaka matoktsü.

Tena anema on-field umpires Joel Wilson aser Adrian Holdstock, 3rd umpire Michael Gough aser 4th umpire Rod Tucker nungeri ken o benoka liasü.

West Indies tetsür team-i Pakistan nung cricket asayatsü

Mongputeni/October 25, 2021 (Agencies): Pakistan Cricket Board sangdong ka ajanga angazükba agi, taruba ita Karachi nung ODIs asem asayatsü atema, West Indies tetsür cricket team pur Pakistan-i arutsü terenemba lir. New Zealand aser England team nati Pakistan den asayamung thinenba sülen, Asia linük (Pakistan) atema iba tour (West Indies vs Pakistan) ya maongka tulu asütsü.

Aruya aliba World Cup qualifiers, koba November 21, 2021 nungi tenzüka asayatsü, iba asayamung atema team anaprongla Zimbabwe maodang, November 8, 11 aser 14, 2021 team ana tsüngda ODIs asem asayatsü.

"November ita West Indies tetsür cricket team-i Pakistan nung cricket asayatsü mulungtetba atema onok pelar. Pakistan nung tetsür cricket renloktsü, parnok alimai tali jangjatsü aser iba saisapong ajungkettsütsü atema iba series ya tongtibang asütsü. Iba dak alia, aruya

aliba series ajanga World Cup qualifier atema renemshitsü asoshi team anaprongla nem maongka tulu agütsür," ta PCB chairman Ramiz Raja-i ashi.

"West Indies tetsür indang tour temer sülen, December nung tebur team (West Indies)-i ODIs asem aser T20Is asem atema Pakistan semdangtsü. Ajasünung, taküm küm tatemlen Pakistan cricket fans temi linük nung tetsür aser tebur cricket asaya reprangtsü asoshi maongka tajung angütsü," ta Ramiz-i shisem.

Tang, UAE nung asaya aliba T20 World Cup metenzükdang, security tensa dak sendakba nung, tawa New Zealand aser England team anapronglai Pakistan tour nung shilem magitsü lemtet.

2009 küm, kiralongrartemi Sri Lanka cricket team dak amakba sülen, security atema tebilemstü tulu adokba ajanga, Test asayar team tongtibang timba kati Pakistan nung cricket asayatsü asoshi memolungi aruogo.

Challenger Trophy atema IFBC nungi Raja shimogo



Dimapur, Mongputeni/October 25 (TYO): Indian Fast Bowling center nung training agir aser Nagaland U 19 team fastest bowler Raja, BCCI Under-19 Challenger Trophy atema shimogo.

IFBC nung adenba mapang pa indang speed 114kph dang liasü saka IFBC coach Wati Imsong tawabangba kübok training agiba sülen pa indang speed 19 kph agi timba küma pai tangbo ball 133kph nung

ointeter aser pa Nagaland nung U19 category nung fastest bowler lir.

Pa IFBC nung training agirtem rognung ball takaratiba aoba bowler tasembuba lir.

Raja-i tawa Vinoo Mankad Trophy 2021-22 nung Nagaland team nungi asayaogo aser U-19 Men's One Day Challenger Trophy 2021-22 atema BCCI-i shimogo, koba Ahmedabad nung October 25 nungi November 10 tashi asayatsü.

BILEMDANGANG

"Tebilemba tajung aliyonga mapa küma minyakra amajok."